

Governu entrega Proposta Orsamentu Jerál Estadu tinan 2024 nian ba Parlamentu Nasionál

Governu liuhusi Ministra Finansas, Santina José Rodrigues F. Viegas Cardoso, Vice-Ministru Asuntus Parlamentares, Adérito Hugo da Costa, no Vice-Ministra Finansas, Felicia Carvalho, ohin loron 23 fulan-novembru tinan 2023, entrega Proposta Lei Orsamentu Jerál Estadu (OJE) tinan 2024 nian ba Prezidente Parlamentu Nasionál, Maria Fernanda Lay.



OJE tinan 2024 ho valór total konsolidadu millaun rihun US\$ 1,95 ba Administrasaun Sentrá, RAEOA no Seguransa Sosiál, sein Fundu Rezerva Seguransa Sosiál. Valór ida-ne'e inklui dotasaun millaun rihun US\$ 1,83 ba administrasaun sentrá no millaun US\$ 60 ba RAEOA.

Primeiru-Ministru, Kay Rala Xanana Gusmão, iha nia karta ne'ebé dirije ba Prezidente Parlamentu Nasionál, hamutuk ho Proposta Lei, salienta katak OJE tinan 2024 " ho ninia orijen iha objetivu estratéjiku ne'ebé define ona iha Programa Governu Konstitusionál IX" no "lansa baze sira hodi konkretiza objetivu sentrá sira ne'ebé trasa ona ba tinan lima oin-mai, ne'ebé define hanesan prioridade investimentu públiku iha infraestrutura fundamentál no kreximentu ekonómiku nu'udár motór sentrá no fundamentál ba dezvoltamentu nasionál".



Primeiru-Ministru mós temi katak "Governu identifika área krusiál tolu hodi realiza investimentu substansiál iha área infraestrutura produtiva sira," ne'ebé inklui setór eletricidade, konstrusaun infraestrutura, petróleu no gás natural, no subliña importánsia hodi "garante fornimentu enerjia ida ne'ebé fiável no asesivel ba populasau no empreza sira," no mós desenvolve infraestrutura no otimiza rekursu natural nasionál sira hodi promove dezvoltamentu ekonómiku sustentável.

Xefe Governu destaca mós katak "Orsamentu Jerál Estadu tinan 2024 marka mós adosaun ba iniciativa no reforma prioritária no estratéjika lubun ida ne'ebé prevee iha Programa Governu nian", hodi alkansa prioridade sira Governu Konstitusionál IX nian ba "diversifikasaun

ekonómika no kriaunsaun empregu”. Hosi iniciativa no reforma sira-ne’e, Primeiru-Ministru destaka desenvolvimentu Kosta Súl, finalizaun prosesu definisaun fronteira terrestre no marítima ho Indonézia, konkluzau instalasaun kabu fibra ótika, reforma iha setór justisa, no, aumentu apoiu Estadu nian ba ferik-katuas no inválidu sira, hamutuk ho “investimentu iha setór fundamentál, hanesan agrikultura, peskas, pekuária, turizmu no promosaun ba indústriá ki’ik no média sira”, “ho objetivu atu hamenus dependénsia ba sasán importadu sira liuhusi troka produktu sira ne’ebé bele fabrika iha rai-laran, hodi promove aumentu ba oportunidade



formasaun no kriaunsaun empregu”.

“Atu bele halo adosaun ba medida estratéjika no indispensável sira hodi fó satisfasaun ba nesesidade jersaun atuál nian no fó ferramenta sira ba jersaun tuir-mai, hodi promove moris-di’ak ba ema hotu no ba sidadaun timoroan ida-idak no hodi asegura desenvolvimentu sustentavel país nian iha tempu naruk”, Primeiru-Ministru submete ona “hodi hetan konsiderasaun hosi Parlamentu Nasionál, aprovasaun transferénsia husi Fundu Petrolíferu ne’ebé boot liu Rendimentu Sustentavel Estimadu”.

Ho konsiderasaun katak “ita iha ona fulan-novembru nia rohan, nomos loron 28 fulan-novembru no loron 7 no 8 fulan-dezembru nu’udar feriadu nasionál, ho período Natál ne’ebé besik ona, Xefe Governu husu “atu Parlamentu Nasionál atu determina karakter urjénsia iha prosesu lejizlativu kona-ba Proposta Lei Orsamentu Jerál Estadu nian ba tinan 2024”, tanba “apresisaun ba proposta orsamentál laho urjénsia sei impede konkluzau ba prosesu lejizlativu molok tinan ida-ne’e remata, ne’ebé sei implika prorrogasaun vijénsia Lei Orsamentu Jerál Estadu tinan 2023 nian ba tinan 2024 no, tanba ne’e, aplikasaun hosi rejime duidesimál”.

url: <http://timor-leste.gov.tl?lang=tp&p=35184>